

A Monthly Christian Magazine


AN ORGAN OF THE ZOU PRESBYTERIAN CHURCH SYNOD

Christian Tangkou

ဗုဒ္ဓကမ္ဘာ့စာပေ တီထွင်ပညာ

Vol. 58 || No. 8

August, 2022



Editor: Rev. Khamchinkhai

Synod Kumpoon:

KEMTU GIN-UM

[1 Korin 4:2]

Khristian Tangkou

Vol. No. 58 || Issue No. 8 || August, 2022

A sung thu

Editorial Board

Editor : Rev. Khamchinkhai - 8730933744
 Joint Editor : Rev. Dr. Hangpi Maunlun - 9862910875
 Cir. Manager : Upa Jamsianmung - 9862086615
 Bus. Manager : Upa Kamgenpau - 8974612937

Ms. Niangkhanmang
 Nh. Tracy Niangsuannuam
 Nh. Suanneiching

Cont. Editors : Rev. Awnkhankhup
 Rev. Zamlianpau
 Rev. Lamsuanthang
 Upa Khupsuankham
 Upa Khaiminlian
 Upa Thangzasuan

ZOU SYNOD ULIENTE

- **Moderator:**
Rev. G. Mangmuanthang
- **Moderator Elect:**
Rev. Thangboi Khuongsai
- **Secretary (Sr):**
Upa Chinsuanthang
- **Secretary (Jr):**
Upa Siendeithang
- **Treasurer:**
Upa M. Sianzahau
- **Statistician:**
Upa T. Hauzalam
- **Executive Secretaries:**
Rev. Khamchinkhai
Rev. Dr. Hangpi Manlun

- Editorial..... 01
- Thu tuomtuom & Thumpi ding 02
- CHURCH ETHICS 03
- Hattuum leh a kemtu (Sutzopna) .. 06
- Nasep gimna man ahi 11
- Trinity & A nasep uh 14
- Rapture & Second Coming 18
- Haitha 20
- ZPYF Column 23
- ZPWF Column 24

Copies - 1200

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



BIEHINN KAI CHIENG A UM DING DAN

I Pasion i biehna ding Inn khu a kitup theipen leh a siengthou thei pen ahi ding ahi. Apulam leh a sunglam, a Inn zil a kilawm leh siengthou ding ahi. Maimom lenkai leivui khu, chair, table, pulpit bench chite a nit lou ding ahi. Mi mit dou thei ding sil/van koilou ding, aki lawm thei bang leh a zatat um thei dinga jep ding ahi. Compound sung zong siengthou ding ahi. Biehinn kai hun ding leh a dahkal i bikhiehang bang a kai chiet a jui chiet ding. Biehinn a Pasion be ding pouma in sil leh ten kituptah sil a ten ding ahia, T.Shirt ngawng bei, tawka sing, Jean tawka-Jacket, towel teng, nasepna puon chite hilou ding ahia, akan aval a jong kichei lou ding ahi. Biehinn sung a phone ginsah lou ding. Biehinn lut masang a kamsunga umteng koi khiet ding, dangtah, zunsuoh kha leh chia lut masang a bawl sieng ding ahi. Biehinn na lut na touna mun ding kituptah a na tou zaw chieng in thumna nei in, touna tuonlele kilawm lou ahi. Biehinn na lut leh a tawp masang khatvei tei pawt ding sawm sin. Biehinn a ta leh nau i pui leh kikhop subuoi lou ding in control in, mi nau Biehinn ah nou sin. Biehinn sung ah a kikhel thei ding ahilou leh kihou chite bawllou ding ahi. Biehinn kai chienga Bible, Labu ken ding ahi. Biehinn sungah programme tuom bih ahi lou leh lim lah lou ding. Numei pasal touna atuom a um ahia, atuom tuoh a tou ding ahi.

Atung masa a mailam a touna a tou ding. Thumna nei hun a mitsin chiet ding. Biehinn sungah Sacrament chilou bangmah neh a dawnlou ding ahi. Biehinn kai khu kilepna a zat lou ding ahi.

Biehinn sunga lusu/imu kha a umleh atoupite mawpuoh ahi. Tholom donthaw sang in kotbul ah ana daw thawlei akitup zaw ding hi. Biehinn a silpieh haichi/sum i tawite a hoihoi tawi ding ahi. Mi kapna

a Bible simlou ding leh thu genlou ding ahi. Biehinn a maitam table a silpieh Haichi tawi khawmte koilou ding ahi. Ahithei tan a Biehinn sunga Committee neilou ahoi hi.



Thu tuomtuom leh Thumpi dingte



1. Synod Session phasah bang in Synod Workers (Synod Semtute) Koppite Seminar July 20, 2022 (Nilaini) in Synod Committee Room ah nei ahia, Semtute koppite zong kim tah leh thalawp tah in ahing tel chiet ua, tuanah Rev. Awnkhankhup leh Mrs. Liankhoman in Seminar mapui in thu hoi tahtah ahing hil ua, lawching tah in zaw ahita hi. Tam Seminar vaiguon lawching tah a i zaw theina uah Pasion kung a kipah thu gen in Semtute koppiten zong Manggam nasepna ah mawpuohna nei uh ahi dan thei siem kawm a, Manggam kehletna ding a hat zaw sem a a hing sep theina ding un i thumna uah thumpi chiet va ui.
2. Synod Session phah leh thunuasie bang in July 27-28, 2022 in MGP Golden Jubilee Hall, Zou Synod Office, Zomi Colony ah Pastor leh U pate Seminar nei ahia, tuanah Rev. Khamkholun leh Rev. Dr. Lalrosiem inni khat tuoh Seminar hing mapui in Pasion Manggam nasepna a U pate leh Pastor-te sephawm ding dan zilsahna ahing nei ua, tuachin Pastor teng leh U pate kigawm mi-170 Register kibawl in lawching tah a zaw ahita hi. Tam Seminar apat Pastor-te leh U paten Pasion Gam a i sephawmna uah hatzaw lehemnel zaw sem a i sephawm theina ding un i sepna uleh i thumnate uah bawzui chiet va ui.
3. I Synod Calendar dungzui un July 24, 2022 (Pasianni) in Synod huong sung ah **Haitha Vaituon** zah ahia, Pasion apat guolzawl na i tante uh tung a Pasion kung a kipah thugenna hun kizang thei hi. Tambang kawmkal ah i umna gamkai tuom chiet ahi dungzui in haichi tawi dan leh tun dan kibang lou ahina ah Hattuom

khenkhatten tam hun ah mang thei nailou uh ahia, amau haichi tun dungzui a ana zang uhi. Synod Calendar a i tuonsah pen uh tam Haitha zieh a Sunday School khatvei khawl ngai ahizieh in hun khat i guot ua, hinanleh eima gamkai toh kituoh a Local Hattuumten a lemtang zaw a i zah uh (**Local Adjustment**) bawl thei ahi chi thei zing va ui.

4. Pasion mapuina zal in Zomi Colony Presbyterian Women Fellowship (Zomi Colony PWF) ten July 23, 2022 (Kiginni) in i Mission Field uh Mangjing Mission Field leh Paspati Mission Field vena vanei ua, Hattuumte toh Pasion biehnna hun zang khawm in silpieh zong va nei thei uhi.
5. Synod Office a sumlehpai sunlutna zangkhai zaw ding gelna in Synod Bank Account UPI (Unified Payments Interface) Tulai a phone tungtawn a sumlepai kipiehtuona QR Code lah ahia, sumlepai sunlutna (transfer) bawl utte a ding in Synod Website "<https://www.zousynod.org/zom/khil/sumsaina/sum-sun-theina>" ah mu thei ahi. Tam UPI zang a sum sungten remarks (azieh) giel in Accountant-te Whatsapp ah theisah zel lei a hoi ding hi.

~~~~~

## CHURCH ETHICS

- Rev. Khamchinkhai

Sr. Executive Secretary, ZPCS

**Thumapui:** Griks ten thumal khat Kyia Kos (Mangpa china) anei ua, tuakhu phrase a zang in Kyriakon doma/Kyriake Oike achi uhi. a umzie khu Mangpa Inn china ahi. A umzie thuh zaw khu Khristiante Pasion Biehnna mun chi nan a mang uhi. Tami thumal apat in English ten Church chiin ang let doh ua, tuakhu eiten Hattuum/Biehinn chiin i mangtou zelta uhi.

Thuthuntha bu ah ahileh Hattuum/Biehinn genna in Grik ham hithou Ekklesia chi a zat ahi. Hattuum khu Pasion in amite hi dinga mi zousiete lah apat a hatkhawm te china ahi.

Hattuum ahing dinkhieh dan i ngaituo leh a thupi mama a, a zatat um mama a, khovel a pawl ding doh te toh aki bang sia, tekhn thei zong ahisih hi,

Hattuum khu atah a muthei, khovel a hing ding khia khovel a zat ding ahi lai in khovel khellam ban ah Hagau lam sil (Eschatology) zong ahuom ahi. A dindoh dan zong Pasion lemguotna a kipan leh kinga in, khovel a muthei in ahing ding doh a, hinanleh mit a muthei khellam ah kumtawn gam tan a huop suoh ahi.

Tambang ahizieh in khovel a i um sung un Gingtuten Gingtute ni poimawte ingai khawh un init uhi.

### **PASIAN BIEHNA**

Pasion bie a Biehinn kai pen gingtute alou theilou a a bawl ding mawng ahina ah i bieh i Pasion khu akipah in alung kimdiei chi khu i gel jing ding a poimaw ahi. Pasion i bieh khawmna ah tam anuoi a bang in hun aki hawm hi.

Puitu

Hun Pantu

Latang septu

Tholom lantu

Special No.

Hattuum Thupuon

Thugentu

Khuongpu

Tam atung a teng mipi Biehinn kaiteng mapui ding ahi ua, ulsun tah a bieh khawmna pat leh zaw ahitheina dinga mawpawtu te ahi.

Puitu : Mipi tun masang a tun ding, kilat siengthou ding puonsil nihten kitup theipen a kivon ding Laisiengthou sim dingte ready sa a koi ding. Phatna la akisah leh sah ding. I touna moh nuasia lou ding. Ahuntah a pat ding thugen teng comment bawllou ding. I taw uh khamta van la khat sava ui chite bawllou ding, ut teng ban genlou ding deithusam pou genlou ding, mipi idin sah ding leh i khut jap in ding va ui/tou va ui chi ding.

**Hun pantu:** Thu mapui gen a a guot tute kunga kipahtu gen chite bawllou ding, Pasion in tambang hunpha ang musah zieh in chia igen leh thu khat, kikau chite genlou ding, latel bang khenkhat in thangsah mama, ahun amun zil chimai vai! Laisiengthou i deina zousie sim ding zong hisam lou in mun 1 leh 2 kichientah a siem a thumna nei ahoi hi.

**Latang zehtu:** Mi zah a aw chiengtah a zeh sawm ding, eima deithu a moh viel gengen lou ahoi, Microphone a gen ihi leh eiman isah leh mipi sah kiza nonlou-Khasi lah ah la tang kispah lou a labu ki et chiet uh.

**Tholom lantu:** Tholom lantu in i kiphah bang leh a guolzawlina itan banga i tawi khawm sum leh pai huon haichi ziet leh vei anntangham Manggam nasepna

ding leh Hattuum kepna ding a tawi khawm thei zieha kipahtu gen leh a petu ten pe zomtou thei zel dinga guolzawl ngetsah leh silpieh toikhawmte lukhong neitah a zat ahi theina ding Pasian kunga apkhieh ahi. Tholom lat chienga Pasian zatat nan ding va ui.

**Thupuongtu:** Secretaryte thupuon hilou in Hattuum thupuon LCC, PWF, PYF, MB, utteng gending hilou in a point khu gen a sermon lou ding.

**Special No:** Pasian phatna la mimal, a group, lapawl ngaikhie a nop a, a kaidan siem nailou a sah ahiei, a aw in ana ngaisih unlen athu in ana ngai zaw un chite genlou ahoi. Track a sah ding ahileh bangkim ready sa a koi ana vah huoi hi, tualeh akim khat sah zou nua a buoina a um a khawl kha ihi in zong isah kia leh zong abul a pat ngai nonlou a aban a zopsuah ding ahi. Sui tawm thu bawl tawm thu umlou ding, khenkhat mi um muonglai khat leh ni hing chiel tawm in asah.....

**Thugentu:** Mipi kinepna pen ahi, a sawt atom thukhat, mipin lunglut tah in angai na uoi? chi khu thei a poimaw, kikau chite ballou ding. Gen leh genlou ding khenthei ding. Pulpit a genchi genlou chi khensiem ding. Mi kawhna a thu genlou ding.

**Khuongpu:** Hagau mei taw kuong ding a panmun latu ahi chi aki manghil lou ding ahi. La telsa a koi ding, la tawh kituoh a khuong tum sawm ding, khuong tum a mi dinsah chite bawllou ding, mi lusu uh chia khuong moh tumlou ding.

### **Thupoimaw tuomtuomte.**

- 1) Local Committee ah khut dom in vai a kihawm ngaisih hi.
- 2) Bieh kikhopna ah huntang tuten ahun uh a zah theilou ding leh midang a pesawn ngaisih. Puitu/Chairman a theisah zaw uh.
- 3) Eima Hattuum sung mi hilou mi dang i goi ding leh Bieltu Pastor theipina angai hi.
- 4) Bieh kikhopna a thupuon khu Secretary thupuon hilou Hattuum thupuon akichi hi.
- 5) Seminar paper khu pulpit ah aki la ngaisih hi.
- 6) I thum chieng un Pasian i addres ua, Jesu min in i ngen uhi.
- 7) Biehna kikhop puitu khu Meeting Chairman akichi ngaisih, meeting aki hilou zieh in kikhop puitu akichi mai hi.
- 8) Kikhop puitute leh thugentu ten eima touna nuasie in mun dang ah akilam ngaisih hi.
- 9) Thugentu lia hiel in pulpit ah pahpe a kikoi ngaisih a, tui don ding mipi muthei in a

- kikoi ngaisih, tualeh mobile a limlah zong a kibawl ngaisih hi.
- 10) Laisiengthou i sim ding phawt leh abung achang igen zaw ah Pasian thu Siengthou ngaikhe va ui a kichi zel hi.
- 11) Thugentu ten atui/phur vang un pulpit a tum thopthop sih uhi.
- 12) Hattuom lamkaite theilou in Biehinn sung vante suonle in aki ladoh ngaisih hi.
- 13) Biehinn lut leh tawp ah thumna akinei zel hi.
- 14) Biehinn kaina ah Bible leh Labu aki keng zel hi.
- 15) Hattuom dangdangte khu vangam kailou ding in akigen ngaisih hi.
- 16) Hattuom aw khu Pasian aw ahi chi hattuom aki hi hi.
- 17) Bieh kikhopna ah lenkhawm la akisa kholsih hi.
- (**Note:** Tami paper khu dated 19th June, 2022-nia Presbyterian Church of India, Zoumunnuam Local Seminar a paper kipresent ahi a, a tamzawten i phattuompi ding uh deina toh hing kisuo ahi).

## HATTUOM LEH AKEMTU

(July 2022 Issue Continued)

By:- Upa T.Mangnou,  
Presbyterian Church, Tuining

### PASTOR LEH A TITLE-TE

- Hattuom kemtu chi kammal sungah, etkolna tanvou tuom tuom aum a, tua khu Hagau silpieh chi'n I mu thei hi (Eph.4:11-16). Tuate khu Pastor leh Upa-te chi ahi deu pen hi. India gam Presbyterian Hattuom te'n Sacrament leh Baptisma chilou Pastor leh Upa-te khu hi-na kibang deuin azang pen uhi.
- Thuhun Tha sunga Pastor min tuom tuom imute khu aneia bang ahi:

| English     | Grik        | Zou Kam | Bible Ref. |
|-------------|-------------|---------|------------|
| 1. Pastor   | Poimen      | Chawmtu | Eph.4:11   |
| 2. Bishop   | Episcopos   | Lamkai  | 1Tim. 3:1  |
| 3. Elder    | Presbyteros | Upa     | 1Pet.5:1   |
| 4. Minister | Diaconos    | Nasempa | 2Kor.6:4   |



**Genbena khat:** Korea-te/n Presbyterian Church khu ‘Chhangno Hae’ achi ua, Ordained Upa khu ‘Chhangno Nim’ achi zel uhi. Aumzie khu Chhangno khu Presbyterian, Nim in ‘Upa’ tua khu English a ‘Presbyter’ chi toh akituoh chet hi.

**Aumziete:**

1. **Pastor** = Tam khu Title min I chi thei hi. e.g. Pastor pa
2. **Reverent** = Reverence chi kammal apata hing um ahia, tami apatin min bulah Reverent chi lamtom in “Rev.” chi a gel ahi a (Thupil.28:14; 1Tim.3:11; Tit.2:2 etc.), “Za um” china ahi.
3. **Minister** = Tam khu Statical language ahi I chi thei hi. A min umzie kibang chiet nanleh, a kizahna atuom tuom hiin; mi khat genna ahi zel mai hi. Chi umzie, Statistics form ah ‘Ministers’ chi column ah, Pastor or Rev. a kichi thei sih a; ‘Ministers’ chi ahi se se zel hi. Pastor pa I chi ding chiengleh Minister pa or reverent pa I chi ngai sih a; Pastor pa chi ahi zel bou hi.
4. **Upa** khu Presbyter chi ahia, tua khu ‘vaihawmtu’ chi a zah ahia, Hattuom lutangpi a zong ngai thei ahi.

**PASTOR-TE:**

1. Pastor nasep khu abiih tahin ‘**Mangpa Ansieng**’ hawm leh

‘**Baptisma**’ bawl a, hattuom-te Hagau lama chawmtu ahi pen mai uhi. Ama ute khu Khrist-in a sisan toh alei, Hattuom chawmtu dinga Pasianin silpieh a ei pieh mite ahi ua, tuaziehin, Pasian hatna kichien nei mi ahi ding uh ahi.

2. **Pastoralia in amawpuoh uleh asepinguh agente laha point poimaw dieh li en vai:**

- 1) A bielna hattuom-te Hagau lama chawmtu ding, a bielna hattuomte sunga Upa leh Committee member-te siemlem leh kithutuoh taha apei thei nading ua etkaipi. Kivaihawmna lam phot hattuom pei dan toh kituohin apei ei chite enkai a, siemlem pieh.
- 2) Hattuom zie leh tawndan te etkai pi a, kipuihuoina leh Hagau lam thu a Hattuom pichin suo dinga upa-te suh navaah leh puihuoi.
- 3) A biel ngaikhawha, Sel leh sang bangma bawl dinga hattuom te’n asuithu a, ahat thu ngai lou ding uh ahi. Chi umzie khu “He ought to be availability in His Pastorate Area” china ahi uhi
- 4) A bielna sunga lusuun henem leh uopna lamah a dauthau lou ding uh ahi.

3. **Upa te:**

- 1) Upa te khu: Hattuom nasep dinga mi te kam toh hata um mite ahi uhi. Hagau lam sil ahi

ziehin a dinmun uh ahasa mama hi. Mite'n dihna dihlouna chi khen se lou a, mawsietna leh minsietna tang dinga aphut diehte zong ahi uhi. Hinanleh, khum bang nasem dinga Pasianin ahat mite ahi ziehun dinmun hasa munah ding nan uleh, sep nopna lungsim toh sep muolsuo nopna lungsim nei mite ahi uhi. Pasian guot or ama leh ama kiguot a, campaign hat toh mite kama hat ahi ama? I chi diei?

## 2) **Upa nasep/mawpuohna (Role):**

- 1) Hattuom chawm ding.
- 2) Hattuom sum ngaituo ding (Nas.6:2-6). Etdihna lam toh zong kizop ahi.
- 3) Sep piehna lamah: Sawltah te seppi
- 4) Hattuom etkolna lamah: Vaihawmna bangkima dinmun nei mi.
- 5) Pastor lam ngaituo leh Pastor ding siemkhie
- 6) Pastor toh kithuo a Hattuom etkol mawpuohna.

## 4. **Hattuom sum muna lam:**

Hattuom in, sum amu tam leh tawm khu, Upa-te pahtat huoina leh dem akaina uh pi pen ahi. Upate'n tam thuguh theisiem a huoi mama hi. Azieh pen, Hattuom te khu, sum neisa a pieng ahi sih a, Upate'n akul

dan te hilchien a, genthaw na mai toh zong hilou a, vah hat, gen hat leh donkhawm na toh pieng a, sepkhiehna ahi bou ziehin nasep ding atam mama hi. Khat bawl hoi tah zieha, adangte poimaw nawn sih chi thei ahi sih hi. Bible tapi thei ding khopa sim a, lai isiem law tuonlou toh kibang mai ahi bou hi. Tam thuguh khu hattuom Upa in all-round a sil abawl thei ngai china ahi hi.

Hattuom upa khu tholawm pieh lam thu ah, Hattuom mite kiphah thei na leh kiphah lou theina limlang zong ahi hi. Mite'n a tah tah hi chia a etton thei dinga kiphah mi leh ensahtu ahi ding ahi. Kam mai toh Pasian Na sep piching thei guol ahi lou dan Upa in athei angai hi.

Tholawm mu na ding khu abawl dan ding lampi sui ngap leh bawzui ngap na lou toh piengkhe thei sil ahi lou banah, Upa in a mite mitmua etton thei ding leh, zui thei ding nasep leh sum sen ngapna lungsim toh hattuom khu a it ding ahi hi. Sep ngap chi pen sum tah hilouin, lungsim ahi zaw a, tua khu hattuom itna dihtah ahi a, tam thuguh in agen nuom pen khu lungsim leh, sum tah zong ahuop tuoh tuoh hi.

Hattuom pichingleh naupang kilat na khu Tholawm ahi

ziehin, Upate'n asep ding bang taha asep na munah hattuom khu ahah thei hi. Hat, chi umzie khu ginna bulbal nei, Sakhuo ngaisahna khu ahi a, Hagau lam halthana pen atuom ahi a, tui khu a um hun atun chienga aum pai thei na dinga uum leh bel kizen tah leh mansa a na umsa angai toh kibang ahi hi

**5. Hattuom sum zahna lam:**

1. Upa in hattuom muna lam mai angaituo ding ahi sih a, a zahna lam zong hoi taha a etchet ding ahi. Sum khu a poimawna bangin a ki zang ei, alutna leh apawtna te akimil nai? chite leptuoh zel a a etchien ding ahi. Tami umzie khu mu na ding leh zahna ding guonggalna, Budget Estimate neilou hattuom sungah tua bang sil a um thei dawi sih a, dangka lut dan leh pawt dante khu leptuoh (comparison) abawl ngei ding ahi. Tua khu upa hindan kilatna pi pen ahi hi. Sum thaw mite'n asum thaw dan uh pallet (tranperency) a amu thei ding ua, musah zel khu sum thaw tam semna lampi khat zong ahi kia hi.
2. Tulai hattuomte bawl dan taangpi khu kahasot tuo leh donkhawmna ahi. Thu leh Table work leh genthaw na mai toh sep a sep pichin thei guol ahi lou dan upa in atheisiem angai mama hi.

3. Atawpna ah Jesu min khu sum thahatna lounkala tawisang thei ahi lou banah, hattuom zong sum lou toh suh khantou thei guol ahi lou ziehin Upa khu mawpotu ahi a, asem hoi khu nuomthu genin kipah vanin, sep hoi nei ve lou, panmun dei ve mai mi vang in kipana sangin phunnawina ding bep loungal bangma anei ngai sih ding hi.

**6. Pastor lam ngaituo:**

- 1) Pastor leh Upa nasem dingin Pasianin mite ahan hi (Eph.4:6). Hattuom khu Pasian belam hon ahi ziehin, a enkoltu ding khu hatna dihtah tang lou Pastor siemkhie Upa-te khu Pasian tunga sil bawlkhiel ahi uhi.
- 2) Pastor khu Upa khutsuoh (hand work) ahi ziehin abawl hoi leh nuomthu gen vanin; ahi sih leh thupha atawi angai hi.
- 3) Upa te'n a siemkhieh Pastor te khu, siemphat, suhhat, suhkilawm, suh zaum asawm ding uh ahi. Tua hileh na ang sem hoi thei ding uhi. Hichikhopa Pastor te poimaw ahi dan Upate'n a theisiem ngai ahi hi.
- 4) Upate'n Pastor khu inspector mit toh a et mai ding ahi sih hi. Amaute khu mihing ve ahi ua, hatlana nam tuom tuom in atuom, khup kilawithe, mihingte theipi phahlou damsung khosah, insung, zi leh

ta kalah leitung sil tuom tuomte ah hasatna toh kidim mite ma ahi bou ziehun, atem tawi uh sumawl thei ding silte apata hutkhieh ngaite ahi uhi. Exodus 17:12-a Hur leh Aaron in Mosi khut adopkaang pieh ukhu Pastor-te Upa te'n asomdawl ding etsahna nam khat zong ahi thei hi

### 7. **Qualify Pastor:**

- 1) Qualify Pastor mu ding khu Upa-te nasep leh mawpuohna ahi.
  - 2) Pastor nasem ding khu, I deibang hilou a, I mu thei sunte ahileh I hattuom khu atuohkha ahi mai hi.
  - 3) I mu dan dan ilah sunte zong, I deibang hiloua, I mu sunte ahi kia nahlai leh hattuomin athuohla dieh ding hi. Tam thute tunga mawpuohna nei khu Upate ahi ziehin, aneia bang khu thei zing kawma Pastor a siem ding uh ahi hi.
- a) Bible zil dinga ang kinget chiengleh: Akipatna Tuolsung hattuom Committee ahi ding hi.
  - i) Mipiangtha, Pasian hatna aw zachien mi, Pastor Nna aseppopna zieh etc te check masah ding ahi.
  - ii) Tam te enkai a, abul pan ding khu Tuolsung Committee ahi ngei ding ahi. Tuolsung hattuom interview maituo kha

loua, private zillai, Synod in bookgrant apieh ve mai te khu proper channel ahi na diei? ngaituo huoi ahi.

### b) **Pastor biel khawmpi:**

- i) Mipi, (Khawmpi palai te'n) atunga thute pansanin thu a dong ding a; thudohna zaw ahi chiengleh ama khu pulamah sawlkhieh ahi nuain, palaite'n atungthu asie apha deibanga agen zaw chiengleh:
  - ii) Chairman in lah ding dei leh deilou, 2/3 majority vote toh thu khen leh.
  - iii) Chairman gup mi ahiei, koite pawl deisah leh deisah lou zieha lah leh lah lou hiloua, vote toh khen ahileh ahoi hi. Tua khu mihing ngaidan kigol lou, "mihing aw khu Pasian aw" ahi ziehin tua banga vote toh thukhenna bawl khu Pasian aw banga pom thei hattuom khu a peikhiel thei ngai sih ding a, mihing kala kilung nopmawna te zong a bei sah thei hi. Tua khu hattuom hiselna lampi khat ahi kia hi.
- ### c) **Tua bang zel toh Presbytery Khawmpi:** Tuolsung hattuom apata hing pei tou, Presbytery in Synod a a put up chiengleh: Synod khawmpi ah zong tua teng bang zel a, bawl khu bangchi lezong a ai vei ngai sih ding hi.

# NASEP GIMNA MAN AHI

Upa Thangzasuan  
Kanaan Veng

Nisa nei a na hinna bangmalou Pasion in ahing pieh, na damsung in na iit na zi toh nuomtah in um in. Aziehpén, tuami nadam sung nite a, na sepgimna thaman ahi, achi hi. Aum dan pen, na gim, natawlña, nalemlaw pen, nazi ahi. Nuomtah in umpi in, achina ahi. Tana kumpipa thugen lungsim phongtah mai damsung nite, damlai nite bangmalou ahi. Sep gimna leh lungngaina ngentang ahia, lungmuonpi ding bangma a um sih hi. Tuaziehin khovel pen bangma loute bangmalou ahia, bangkim bangmalou ahibou hi, chi thu in inua, ima tampi ang geldoh sah thei hi.

Khovel ah mihing khat in i hing pienga nuomsa dinga i kinep lai in, koi nopsah le mah in nichin neh ding maimai i buoipi a, azu, ahaam teng thuoh in, sun nitum in nna i hing sem uhi. Huchipi azong, i mu la hun atam nalai a, i mulate tung dipna din batlah ahing ngaita hi. Tuami ditna ding toh a double/ aleni a sep ahing ngai nalai hi. I gim, i tawl belap dingin damlou hun bang ang um nalai hi. Zatu, zaha leizou lou a, sielpi guothuoh a i thuoh hun a bei sih hi. Tuabang hinkhuo genthei huoitah na ngil na dingin, na it nazi toh nuomtah in hing umta un achina ahi. Tami thu toh kizawitawn in Sawltah Paul in I Korin 7:3-5, Nani un natan ding dawl uh hing kipetuo un hing kideeh tuo sih un anachi hi. Hinanleh numei gilou ten, apasalte uh a deeh ut mama ua, tuakhu Zougam Pate buoina pen ahita hi. Thamlou in, ginna lam leh innsung

khosahna tanpha a sukhata hi.

Tuapen pa lungchingten athuoh hamham a, hinanleh pa lungphoh deuten a vuoh law ua, a khul lawta uhi. Tuaziehin khangdawng nounou meithai, taga kibelap toutou ding abangta hi. Azieh i sui suh ding hi.

Siemtu Mangpa Pasion in pasal Adam a siemlai in hichin angaituo hi. Pasal pen zivah, tavah ding leh gam hum a gaal ma a ding diing ahiziehin thahattah in ka bawl dinga, melma mai a phula ding, Humpi mai, Ngaltang mai a pang ngam dingin a khamul zong kapou sah ding hi, achi hi. Hinanleh (pasal tam zawten khi ngamlou uhi) achi bang ngei in a bawl a, thahthou tah leh humhal tah in, abawl nalai hi, tuapen theisiemna neilou, numei gilou ten chimtah huai sa mawh uhi. Amabou Ana ahamsa ahi leh vang

Doctorte doh a suhdam sawm zawh ding ahi. Numei ngaituo siemna nei ten pen kapal lungkimna ka buchimpi ding achi lel uhi. Zi umdan hoite Rubi suongmantam sangin a manpha zaw hi, Thupil 31:10. Zi umdan hoi khu a pasal a dingin Manglukhu ahi, Thupil 12:4, tualeh numei hangsan leh phunhat toh building a ten sangin gamdai a matang a ten ahoi zaw hi, Thupil 21:19 anachi hiel hi.

Numei hing kisiem dan i gen kia ding hi. Mangpa Pasion in ganhingte a siem lai in, a kop kop, anu apa a na siem khawm hi. Hinanleh Adam Pasal a na siem lai in, amatang in ana tuomsiem khata hi. Tuaziehin koppi ngai in ana lungleng mama hi, tuaziehin, silsiem lah a, hoi mawpen asuohta hi. Alim, amel hoimaw hilou in, a lungkimlou zieha, a umdan hoimaw china ahi. Siemtu Mangpa Pasion in Adam kithuopi thei ding a um mawng eima chi in, a ganhing siemte etsah a sawmta hi, alungtuoh bang a um tahleh, ama mat ding achina ahi. Adam suongpi tungah a tousah a, amai laitah ah a banban in ang kizuita uhi. Amasa pen lien a sa senga kasai achia amin ahi denta hi, hinanleh eiten Sai i chi uhi. A ban a pen Avom ziehin Vompi achi hi. Anu zong, apa zong Vompi akichi hi, a ban a pen Lungching asah ziehin Chingpi

ahisah hi, a ban lungsieltuoh asah ziehin Siel ahisah hi, a ban a pen a thuman zieh in Loi achia, eiten Loi i chita hi, a ban a pen Khi Aw, abah ziehin Sakhi Aw achia, eiten Sakhi i chita uhi. A ban a pen a San ziehin Sasan ahisah hi, a ban a pen Amaingal ziehin Ngal a hisah hi, a ban a pen a khaw ngai dengdong ziehin Sangai ahisah hi. A ban a pen aling a ku ziehin Saku ahisah hi, a ban apen zawntuoh asah ziehin Zawng ahisah hi. Tungleng vate amasa pen Agiih ziehin, vagih ahisah hi, a ban a pen akiphuol zieh in Vaphuol ahisah hi, a ban a pen a men zieh in Mengkeng ahisah hi. A ban a pen Ameipal ziehin Utong achi hi, a ban apen a hamdan zil in, Va Ah achi hi, a ban apen Aah abah ziehin Aahpa ahisah hi. A bana pen silmu a siem zieh in, Mupi ahisah hi. Tabang zel in, aham dan leh amel zil in a min dinguh apuoh sah hi. Hinanleh, a kipawlp i theiding a umlou zieh in, apei liemsah siengta hi. Siemtu Mangpa Pasion in numei poimaw hi chi a theita hi.

Hinanleh ganhingte banga aha mang khah ding adeilou khah ding azau mama hi. Tuaziehin abawl dan ding tabangin angaituo hi:

- 1). Adei a dei huoi a bawl ding
- 2). A ngai a ngaihuoi dinga bawl

ding

3). A iit a iit huoi a bawl ding achita hi

Adam nuomtah in a imusah a, anahgu khat Numei dingin abawlta hi. Vunnem ngii ngei in atuom a, amel ngai bangtah in a bawl hi, amel kilawmsem na dingin akhamul ding teng zong azut maisah sieng hi. Etna huoitah in abawlsahta hi.

Azaw in Adam a khanglou sah a, a peta hi. Adam in e! keima tahsa apan a kibawl keima banga gu leh tangnei achia, tuaziehin Amin dingin Evi (Numei) achita hi. Silsiem lahlah a, zeneipen leh nukhia pen Numeite ahita hi.

Siemtu Mangpa Pasion in pasalte a dinga, abawl nana nakhu Adam in alungmuonpita hi. Hinanleh tunia i gen utpen khu Nupa khenkhatte kilungmuonpi lou atam mama hi. Tuabang ten innsung khantou ding adal guoh hilou in, sakho lam zong nahpitah in a sukhata hi. Thamlou in, ta leh naute zong a didaita ua, a taga suohsah nalai hi.

Tuaziehin ka unau ngaitahte aw, na koppitengah na lungkimsah in, Mangpa nang toh kituoh a ahing pieh ahi. Upaten galzau gallutuoh achi bangin a dang nei le chin zong hoimaw zawsem thei ahi.

Taziehin na koppitengah na dang nei le chin zong hoimaw zawsem thei ahi. Tuaziehin na koppitengah na dang nei le chin zong hoimaw zawsem thei ahi. Tuaziehin na koppitengah na dang nei le chin zong hoimaw zawsem thei ahi. Tuaziehin na koppitengah na dang nei le chin zong hoimaw zawsem thei ahi. Tuaziehin na koppitengah na dang nei le chin zong hoimaw zawsem thei ahi.

Damlai hinkhuo tomnou kalah, tunia dam khawmte mi vangpha ahi. Hinanleh, damkhawm den tuon ding i hisih uhi. Koizaw shi masa ding kithei nailoute i hibou uhi. Tuazieha kihauhau lou ding, kideehtuo lou ding, kisuh lungkim tuo dinga, Mangpan ang gawm ahi. Tua bangteng ahi thei na dingin sawltah Paul in ta bangin agen hi. Ephesa 5:22 Zite aw, Mangpa kunga na kituhlut bangun, nouma pasalte uh kungah kitulut un a na chi hi. Tuapen numei gilou ten zui utlou uhi. Tuate pen Pasion theiloute nam mawlte leh apien na innsung thulimloute ahi ut mama hi. Pasion zaute leh Khristian innkuon a, na seilienten, pasal kunga kituhlut ding haa asasih uhi. Zi umdan hoi khu a pasal a dingin Manglukhu ahi. Thupil 12:4 achi ban ah, Rubi Suongmantam sangin a manpha zaw hi. Thupil 31:10 achi hi.

Tuabangten apasal akipahsah guoh hilou in, Pasion

zong a kipahsah ua, guolzawl na zong a tang nalai uhi. Tuachin nou pasal ten zong nouma na ki iit bangbang in na zite uh na iit ding uh ahi. Azi iitpa ama ki iit ahi, koiman atahsa amuda ngaisih hi. Khrist in a Hattuomte avah a, akep bangin, a zite avah in a deibawl zaw hi, Ephesa 5:25-29. Tuamabang in nou pasalte aw na zite uh bel kikeh bai banga ngaituo in, pahtawi dan siem un, I Peter 3:7-Pasian in nite khat in ahing bawlsih ama? Tahsa leh hagau ah amaute gel Pasian a ahi ua, bangzieha, amaute gel khat a ahing bawl ahiei? Aman amaute gel apat Pasian ngaisah chihah asui zieh ahi.

Tuaziehin Hagau lam ah pilvang unlen, koima a sen zi tungah lepchie tah in bawl sih hen, Malaki 2:15-16tan. Damlai khovel tomnou sungah Nupa hinkhuo nuomtah in zang khawm chiet vai, koima kidehtuo sih va ui, tuami dinga Mangpan nite khat a ang bawl ahi chi, mang ngil sih va ui aw...Mangpan athu guolzawlta hen. Lungdam e, umnuom.....

*Note: Nupa hinkhuo khovel a um ahia, i shi nua chiengin vangam ah umtalou ding hi. Innkuon chi zong umtalou ding hi. Damlai khovel a kilungtuohste mi hampa ahi uhi.*

~~~~~

PASIAN A MI THUMTE LEH A NNASEP DAN UH KILAH DAN (Doctrine Zilna)

- Rev. Dr. Hangpi Manlun
Executivce Secretary, ZPCS

Thuchiin: “Tuachia Jesu’n Baptisma a tanzou in Tui sung pan in ang pawt a, khum in Van kihong in Pasian Hagau Vakhu bang a hing kum in atung ah atuong a, tuanah Van pan a aw khat in “Tam, ka Tapa, ka lungdamna mama khu ahi” (Mat. 3:16-17) a chi hi.

1). Thumapui:

Awle, i Bible uah ‘Trinity’ chi thuteng pen a umsih a, ahivang in genchien leh theichien kiphamaw mama thugin poimaw tah khat ahi. Pasian ah mihing thum a um a, Pa, Tapa leh Hagau Siengthou ahi uhi. Amaute khu hina kibang, kumtawn/tangtawn a umzing khu ahi uhi. Hinanlezong, Pasian thumtah um china vang hizawlou in Pasian khat ah hina/mihing thum a um china ahizaw hi.

Tami thugin khu mihing hilchet phahlou sil ahi a, hilchet teitei sawm sang in Bible a i mu bangbang a pom khu ahimai hi. Masanglai in mi khen khat in “Pasian khat bou ahi-a, a chiil in Pa bang in ang kilang a, tuazou in Tapa bang in ang kilangkia a, tu-in, Hagau Siengthou bang in ang kilang hi’ achi uhi. Mi khen khatt’ēn, Pasian khu hun tuomtuom ah, hina tuomtuom nei a hing kilang/kilah bang in a ngai ua, tuakhu, i Bible uh zilsahna toh kituohlou ahi. Tam thugin khu Sebellia hing gendoh ahi a, tuajieh in tam thugin min khu ‘Sabellism’ a kichi hi. Tam thugin/zilsahna khu a chiillai in mitamtah in apom ua, ahivang in Thuhun Tha zilsahna toh a kikal a, tuajiehin, Kumzabi thumna (3)-lai in, Hattuomte’n ana nuolta uhi. Ahin, eite lah ah zong tambang ngaidan pawmpawl a um uhi.

2). Bible a Trinity kilah dan:

Tualeh, Genesis ah, Pasian in mihing a siem lai in (Grammar dihtah i sui leh thuteng/kammal khu khat sang a tamzaw (plural)-a zang a, “Eima lim-le-mel sun in eima bang ngel in ... Lei ah thu i neisah diing uh” (Gen. 1:26) chi in i mu hi. Tami khu Bible siemten Thuhun Lui a Pasian a mithumte (Trinity)-kilahna masa pen ahi a chi uhi. Tuabanah, Thuhun Lui ah

Pasian khu a mi Israel tate kung ah Meikuong leh Meipi in akilah/lang hi (Exo. 19:17).

Tualeh, Thuhun Tha ah Pasian Tapa bang in ang kilah na thu isui ding uhi. Lei kisiem masang in Thu khu ana um ahitabout a, thukhu, Pasian toh umkhawm in Pasian bang in a um hi. Tua thu khu mihing a hing pieng in.... (Johan 1:1). Tualeh, Mangpa Jesun Baptisma a tanlai in, Pa Pasian khu Van a kipat in ahing hamdoh a, Tapa Pasian in Tui ah Baptisma a tang a; Hagau Siengthou Pasian khu vakhu bang in Tapa Jesu tung ah ang tuong/tu hi (Mat. 3:12-17). Tamkhu, Pasian chiengtah a thum bang a ang kilahna ahi hi.

Tuabanah, Jesu’n, baptisma tansah diing dan ahilna ah – “Gam chin ah pei unlen mizousie ka nuazui in siem un; Pa, Tapa leh Hagau Siengthou min in baptisma bawl un” (Mat. 28:19) achi hi. Tualeh, Sawltah Paul in zong, “Mangpa itna, Pasian zangaina, Hagau siengthou pawlna” (II Kor. 13:14)- chi’n agen hi.

3). I Bible ua Trinity nnasepdan khen khatte:

3.1). Silsiem a akilah dan uh: -

Pa Pasian in - “Vah hing umhen achi hi” (Gen. 1:3). - Tapa Pasian - “Achil in thu ana um a, thu khu

mihing a hing pieng in” (Johan 1:1, 14), - Hagau Pasion - “Pasion Hagau khu Tui tung ah avah kawikawi a” (Gen. 1:2; Job 26: 12-13), ah i mu uhi.

3.2). Jesu pienna ah: -

Pa Pasion - Tapa khattang neisun petu (Johan 3:16), ahi. - Tapa Pasion - Leitung ah a hing pieng a (Luk 2:1). Tualeh, - Hagau Siengthou Pasion - Mary naupaisahtu (Luk 1), ahi hi.

3.3). Hundamna nasepna ah: - Pa Pasion - Tapa kipumpiehna pomtu (Heb. 9:14), ahi a, - Tapa Pasion - A mite adia kipetu (Heb. 9:14), ahi. Tualeh, - Hagau siengthou Pasion - Tangtawn a diing a sudettu (Heb. 9:14), ahi.

3.4). Thumna ah: - Pa Pasion - Thumna ngaikhetu ahi a (Johan (6:13), - Tapa Pasion - Ama min a thunget diing (Johan 16:23), ahi a, tualeh, - Hagau siengthou Pasion - Lungsim heilamdangtu leh mite piengthasahtu (Johan 3:3-6), ahi hi.

3.5). Thawkiana leh hinkhuo piehna ah: - Pa Pasion - Loupina ahing laluttu (Luk 10:20), ahi a, - Tapa Pasion - sisan lultah a khelna silsiengtu (Ephesate 1:7), ahi. Tualeh, - Hagau siengthou Pasion - Lungsim heilamdangtu leh mite piengthasahtu (Johan 3:3-6) ahi.

4). **Dihpen chet sih leh zong etsahna chituomtuomte tungtawn in/zangin Trinity hina gen i sawm ding uhi:** I gensa bangun, Pasion a mithumte tungtang mihingte pilna toh genchet leh sutthei tahtah ahisih hi. Ahivang in, Ama (Pasion) hina neukhat beh i theitheina diing un etsahna chituomtuomte toh igen ding uhi. Ahin, tamte khun Trinity hinatah a genchieng thei hi china vang ahisih hi.

Tuate:

4.i). **Tui toh tekah talei:** Tui khu chithum in ahina muthei in a um hi. Etsahna ding in, tui khu Pasion hita leh (Tui=Pasion), Tuikhal/vua khu Tapa Pasion hita (Tuikhal=Tapa Pasion) leh, Tuihu ahileh Hagau Siengthou Pasion (Tuihu=Hagau Siengthou Pasion)-chite in, genta lei tui ah hina chithum kikhentheilou imuthei uhi. Khat hingal chithum a hina kilangthei china ahi.

4.ii). **Ni (Sun) toh tekah kiatalei:** Nisa (sun) hina zong chithumin i suithei uhi. Nisa pen Pa Pa Pasion hita (Nisa= Pa Pasion)-leh, Nivah khu Ta Pasion hisahta lei (Nivah=Tapa Pasion), Nisatna/lumna khu Hagau Siengthou Pasion (Nisatna/lumna=Hagau Siengthou Pasion)-chite in zong i suithei uhi.

4.iii). **Singkung toh tekah kiatalei:** Sing zung khu Pa Pasion hita

(Singzung=Pa Pasion) leh, Singkung khu Tapa Pasion (Singkung=Tapa Pasion) leh sing-ga khu Hagau Siengthou Pasion (Sing ga= Hagau Siengthou Pasion)-chite in igenthei ding uhi.

4.iv). Mei (Fire) toh takah kialei:

Mei khu Pa Pasion hita leh (Mei= Pa Pasion), Meikuong khu Tapa Pasion (Meikuong= Tapa Pasion), leh Meivah khu Hagau Siengthou Pasion (Meivah= Hagau Siengthou Pasion), chite-in zong itekahthei ding uhi. Tamnah, Mei in lumna ahisihleh satna leh vahna zong a nei hi. Ahivang in a thum un, Mei ahi uhi.

4.v). Ahtui (Egg) - toh gente kiata lei.

Ahtui hawng khu Pa Pasion hita leh (Ahtui=Pa Pasion) Ah tui sung a kang pen khu Tapa Pasion (Ahtui sung a kang=Tapa Pasion) leh Ahtui sung a alaigawl khu Hagau Siengthou Pasion (Ahtui laigawl= Hagau Siengthou Pasion)-chite in igenthei ding uhi. Ahtui ah hina kikhentheilou chithum umte toh gente thei ahi a, ahin i gensa bangun tam a tung a gentena i gente in Trinity hina tahtah agen chieng zou sih hi. Etsahna tamtah gen diing a umkha diing a, hinanlezung i gen chieng theituom sih diing uhi. Tua i gensate akipat in Trinity umzie i thei belap uh i lam-en hi.

4.vi). Mihingte hina toh gente lei:

Tualeh mihing ah khun sil thum - Tahsa, lungsim leh Hagau a um ua, tamte pumkhat hina jieh a mihing um ahibang in Pasion a mi thum igente zong pumkhat ahidan u'toh gente thei ahi

5). Thukhumsin:

Bangteng hilezong, Trinity khu chientah a thei hamsa mama khat ahi hi. Ajiehpén, Pasion khat khu thum ahi a, thum khu khat ahi. Ahina kichientah a i theitheilou khu pong buoipi louzawh diing ahi. Mi'n Trinity a theichien theilou jieh khu khoh asah leh a buoi deudeu kha diing hi. Ajieh pen Trinity khu Mangpa Pasion Hagau kithuopina toh theichet thei sil ahibou hi. Paul gendan in, "Pasion in Leitung a siemchil akipat in mutheilou ama loupina, A tangtawn silbawltheina, leh ama hindan siengthou khu chientah a mu in" a um hi a chi hi.

Pasion in a siemsa silte akipat mite'n Pasion hina tahtah a theithei uhi. Tuajieh in amau a diing in paulap diing a umsih hi (Rom 1:2). Bang silsiem pen tungtawn a theithei diing e chita uleh - Pasion in mihing asiemdiing in 'Eima bahpi/eima bang/suun in siemvai' (Gen. 1:20) achi hi. Tamnah Trinity chientah in akilang mama hi.

RAPTURE LEH SECOND COMING

- Rev. Stephen Khupsianlal
Local Pastor, Shillong

Thumapui.

Christian gingtute lah akhun Bible in hun nukhieh lam a sil hingtung ding dan agente theibuoi zieh in lungbuoi tampi ki um hi. Tambang theikhielna umte lah ah ei gingu khenkhat te khun i theibuoi mama uh khat khu Rapture leh Second coming thu ahi. Tam khu mi tampite'n akibang dan in ngaituo ua, lametna neikhiel ua, khenkhat kia ten Tribulation gimthuohna thuoh kha ding banga ngaisutna nei in Rapture zong Tribulation hun kim lai a hing tung dinga ngaituona neikhiel jong tampi um hi.

Khenkhat kia ten Bible in Rapture agen khasih hi, tuazieh in gingu piengthate lahtouna khu umlou ding bang in ngaituo khiel kia uhi. Rapture leh Second Coming hun tuomtuom a tung ding ahidan theikhiel zieh a ngaituona neikhiel a kinepna neikhiel umzieh in Bible in kichientah a agendan khu theisiem poimaw mama mai hi.

1). RAPTURE: Rapture chi khu Latin ham in 'Raepius' akichi a, Greek ham in 'Harpazo' kichi hi. Tuakhu 'Lahtou' or 'Lah mang' (Caught up) chi na ahi. Tam khu Paul in 1 Thessalonika 4:13-18 ah kichientah in agen a, tuaban ah 1 Korinth 15:21 azong genkia hi. Paul in Rapture hun a sil umding dan agenna akhun van a pengkul gin izah chieng ua ei gingu piengtha ten imusate imakhellou

ding dan uleh Khrist a shisate thou masa ding uh ahidan gen hi.

Amau te thawdoh zou chieng a ei hinga na um nalai te toh huikhuo ah Mangpa tuoh dinga amau toh meipi lah a lahtou (Rapture) a umkhawm ding ihidan uh kichien tah in gen hi. Rapture hun a eite khu lahmang a umta ding ihizieh un Kum 7 Tribulation gimthuona huoise kithuoh khalou ding ahi.

Tualeh Paul in Rapture a itahsa ukhu 'Suhlamdang in i um ding uh' achi a, tuami suhlamdang tahsa loupi toh thuom in ium ta ding uh ahi. Tami tahsa suhlamdang a umding khu thoukia i Mangpa tahsa loupi toh kibang khu ahi ta ding hi.

Tua leh Rapture khu mitphetkal in ahing tung

dinga, nuasia a um ten bangma theimanlou ding uhi. Nasepte 8:39-40 ah khun Mangpa Hagau in Phillip khu thakhat thu a alahmang dan leh amuten Azotus khuo a ava mukia dan uh kigen hi. Tuakhu mitphet kal a Phillip in Rapture achep lawhna khu ahi. Tuaban ah Rapture hunkhu banghun a hing um ding ahiei chi koiman agenthei lou ahi. Pa bou in athei ahi. Tulaitah a ihunzah ukhu Hattuum Hun or Hepina Hun zong kichi hi. Tam ihun zah ukhu Rapture hun ah hingbei ta ding hi. Tu Hepina Hun akhun Mangpa'n ei gingtute kungah hundamna thu phuonzah dingin mawpuohna ahing pie uhi. Nanleh Rapture hun chiengin Mangpa'n piengtha zousie ahing lamang ta ding hi.

2). **SECOND COMING:** Leitunga iMangpa Jesu ahing pei masat hun khu 1st Coming aki chi a, Zekaria 14:4 gen banga Olive muol a ahing kum ding khu leitung a nivei ahing pei na ding ahizieh in Second Coming ichi uhi. Ahing pei masat

leh ahing peikia ding hun kikal akhun Hattuum Hun izang lel lel ua, tam hun khu Rapture chiengin abei ding ahi.

Rapture zaw chiengin kum 7 Tribulation (Daniel Hapta 70 chinna) hing umngal ding a, tuazou chiengin Second Coming hing um ta ding ahi

Rapture khu mitphetkal a misiengthoute lahtouna ahia, nuasia a umten bangma muman lou ding uhi. Second Coming hun pen ah mit zousie in mu ding uhi... Michin in amu ding ua, tuachin nam zousie in asuun ding uhi (Mathiu 24:27).

Rapture hunding khu koiman athei sih a, nanleh Second Coming pen Tribulation zouchienga hing tung pai ding ahi hi *(Mathiu 24:29-30). Rapture hun akhun i Mangpa Jesu piengthate latou dinga hingpei ding ahia, Second Coming hun akhun piengthate toh van apat hing kumsuh khawm ding uhi (Zekaria 14:5). Mangpa'n hing goulzawl hen 🙏.



HAITHA

Mathew 6:19-21

Lei a nget leh sam eeh in aneh sietna ah leh gutaten aphevang ua, a guh theina uah gou kikhoh sih un. Hinanleh van ah, nget leh sam eeh in a neh siet louna leh gutaten a phevang ua, a guh louna uah gou kikhoh zaw un. Aziehpén na gou umna mun ah na lungtang u'zong a um ding hi.

1. Thumapui?

Mihingte Pasion in Eden huon a, ahing koi lai in Pasion in kammal khat toh ahing nuasie a, tua khu “Eden huon hou ding leh enkol ding” chi ahia, tualeh Pasion in A siemsa zousie enkol a kem ding in ahing ngansie hi. Tam hun apat in mihingte khu, Haichite, Ganhingte leh Pasion in A siemsa zousiete tung ah etkolna nasem ding in Pasion in mawpuohna ahing pie a, tua a guolzawlinate khu hing pung zel ding leh suonle-hah (nou) nei zel ding in guolzawlina ana pie hi. Tualeh, Pasion in thupieh ahing pieh na ah ei a ding a, ahing piehte toh Ama pahtawi a, Ahing guolzawlinate theizing a, Ama kung ah sillat a tawi ding in ahing thupieh hi. Single-lou leh haichi mai hilou in a guolzawlina thupipen a i ngaituo uh “Tate” tanpha Pasion in a huomsah hi. Genesis 2:15; Genesis 1:28-30; Leviticus 23:10; Exodus 22:29

2. Bangzieh a Pasion kung a laan ding ihi uoi?

- a) Mangpa'n ga masa leh sillat zousie ah ahoipen ahing phuut a, ei deiloute zong a dei tuomsih hi. Mangpa apat sil hoi i kinepleh eiten zong Mangpa ah ahoipente i pieh ding uh ahi. Pasion guolzawlina itante tung a lungdam thu genna leh a guolzawlinate i innsung a, a um den theina ding in. Pasion guolzawlina i phawh thana uh ahi. (Ezekiel 44:30; Malachi 3:11)
- b) Thupieh ahizieh in Pasion kung ah i laan ding uh ahi. Tam khu ngetna leh chielna zong ahisih a, thupieh, bawllou theilou sil ahi hi. (Leviticus 23:10; Exodus 22:29; Nehemiah 10:35; Deuteronomy 26:2)
- c) Mangpa pahtawina in i laan ding uhi (Thupilte 23:9). Mangpa kung a i lungdam

chieng ua, Ama i pahtawi uh khu thu mai hilou in sep-lebawl a, silpieh toh i pahtawi ding uh ahi. Khut guoh a na hing pei ding uh ahisih chi ahi. (Thupilte 3:9-109; Romans 11:16)

e) Van ah gou kikhoh ihi uhi. Mangpa a ding a silpieh ipieh pouma khu leitung apat van Bank a gou khol ihi uhi. (Mathew 6:19-21; Hebrew 10:34)

3. Bangte pieh ding ahiei?

a) Ga masapente / A masapente pieh ding ahi. Eima neh masang a pieh ding ahi. Neile-lam masapente Law, sum mu, sil dangdang) Gamlah a imu thei leh innsung a, Nehle-tah i bawl masapente zong i laan zel ding uhi.

Tualeh, Khangluiten zong “Ka Pasien, ka lungzai” chiin a neh masang un ana pe masa zel uhi. Tuama bang in eiten zong anneh tuidawn ah Pasien kung ah i thum zel uhi. * Lou houlouten zong bazar a eima sum musate toh i leite khu I hawkhiet gasuote toh kibang ahi. (Nehemiah 10:35; Exodus 22:29)

b) Ahoipente i pieh ding uh ahi (Ezekiel 44:30; Genesis 4:3-4).

c) Ta masapente. Ta masapen pieh ding ahia, tualeh Tat kia ding ahi. (Exodus 22:29; Leviticus 27:3-8)

4. Bangchi pieh ding e?

a) Phaltah leh piehlou theilou bang a ngai leh it kawmkawm a pelou in kiphaltah a pieh ding ahi. Tualeh, lungsim siengthoutah in, nei ziehhausat zieh hilou in kipahna toh pieh ding ahi. Meithainu’n anei sunsun sumtang a pieh khu Jesu Khrist in zong a pe tampen hi ana chi hi. (II Corinthians 9:7)

b) Mangpa i piehsa tung ah thu va nei nawnlou ding ahia, pieh khu eima mawpuohna ahi. I piehna uah kipah a, lungkim ding ahi. (Mathew 6:3-4)

5. Piehlou a khawhna bang ahiei?

a) Kipahlou china khat ahia, tantawh a lungkim theilouna khat ahi. Pasien guolzawlna kipahpi lou china ahi.

b) Pasien suom ihi mai uhi. (Malachi 3:8)

c) Thumanglou ihi uhi. Thupieh, Pasien in “Bawl un” achi hinapi a bawllou khu Pasien thumanlouna ahi hi. Laisiengthou in kithoina sang in thumanna ana deizaw hi. (Leeng Saul in thupieh sanglou in kithoi hi). (I Samuel 15:22)

d) Van ah gou khollou china ihi uhi. Tam leitung ah gou bangzat i khol zong in a thupina toh beimang ding ahia, hinanleh Pasion i piehte khu tu in kimu theisih nanleh dachieng a, Pasion kung i tun chieng in ahing kilang ding a amang ngai nawnsih ding hi.

e) Siensuolou china ahi. Mangpa'n azah dingte a siensuo a, tuni chieng in eiten zong vanzah ineite uh i siensuo ding uh ahi. Mangpa Jesu Khrist ngei in zong Nuajuite A nasem ding a, azah kuon in 'Jerusalem ah na ngah un' chiin thu a pie a, tuachiin Pentecost ni in a siensuota hi. Tualeh Jawlnei Isai zong Mangpa'n ana siensuo hi. (Romans 11:16;

Acts 1:4; Acts 2:1; Isaiah 6:5-9

Thukhumsin:

Jesu khu mishi lah apat kaithaw ahizieh in ama khu ga masapen ahia, tualeh Israelte zong Pasion in ga masa bang in ana ngaituo hi. Tuazieh in inei-ilamte mai hilou in I hagau zong Pasion a ding in ga masa ahia, Pasion kung ah i laan ding uhi. Tualeh mi bawl zieh leh dan ahi zieh ahiei a pieh ding leh lat ding zong ahisih a, i lungtang tawngpen apat deisahna leh kiphalna tahtah toh i pieh ding uh ahi. I Pasion khu pasien dangte bang ahisih a, Ama i piehsate nasan zong eite ahing pe kia zel hi. (I Corinthians 15:20; Jeremiah 2:3; I Corinthians 15:23; Romans 8:23; Revelation 14:4)

Ngætna

Simtu deitahte,

I Mangpa Jesu Khrist min in chibai ka hing buh masa hi.

Pasion mapuina toh July ha ah i ding touta ua tam tan hing puitu Mangpa Pasion min i phat uhi.

Tua ahi toh kituoh in I Khristian Tangkou uh lam man pe nailouten lungsiettah a i Hattuum ua Agent te kung ah ana pe chiet ding in i kingen uhi. Tualeh Life Member, Patron Mamber leh Special Gift bawl utte a ding in bangchi lai pou in zong kot hon zing ahi chi zong i kitheisah uhi.

- Editorial Staff

ZPYF Column

LUNG DAM THUGENNA

66th ZPYF General Conference 2023 Manipur Eastern Presbytery nuoi a Tuiningkuol District, PCI TUINING zintunna a umding toh kisai in **CAMPAIGN & MOTIVATIONAL TOUR** apeisa 9 July to 17 July,2022 sung in District HQ teng ZPYF Central Committee te Group III (A, B & C) in kikhen in veekuolna vaiguon isiem uh, Mangpa umpina leh mapuina toh Vaiguon lawching tah in zaw ahitheina tungah aveel in Mangpa kungah lungdam thu igen uhi.

Tualeh, tam Vaiguon lawchinna ding a pan hinglapi

1. Zou Synod Nu leh Pate ten kiphah tah a Synod Gari ahi zahsah man un lungdam thu igen uhi
2. Sr.Executive leh Ex.Secy / Youth Incharge ten silbangkim ahing lemgelpi ua,ama uhte kungah lungdam thu igen uh
3. Vaiguon hunsung a Puitu,Pantu,Motivational Campaigner te leh Thugenna hing neisah tute tengteng leh District PYF ten nahing nunghuopna tung uah lungdam thu aveel in kahing gen uhi.
4. Vaiguon hunsung in tuolsung hattuum te leh PYF ten kiphaltah in Neh leh tah leh zintun paikhai kituptah a nahing saifel sahna tung uah, aveel in lungdamthu kahing gen uhi.
5. Gim leh tawl khawhsalou a tami vaiguon lawchinna ding a hing kalsuon leh pan hing lahpi zousie mimal khatchiet te tungah lungdamthu kahing gen uhi.

TUOHKHAWM Kimu dan

- | | |
|--------|-----------|
| 1. MEP | ₹ 1,180/- |
| 2. MGP | ₹ 6,635/- |
| 3. ZTP | ₹ 2,650/- |

Manggam a Noute toh Semkhawm

Sd/- T. Naomi Gouliancling
Youth Co-ordinator, ZPYF



ZPWF Column:

JULY HA SUNG A TUNNU LIMBEL PANPITE

(w.ef. 30th June to 1st August , 2022)

1. Upa P.K. Soia, Tuining	Rs.	400/-
2. Nianlianching, Delhi	Rs.	1,000/-
3. PWF, Delhi, Anntang tang	Rs.	10,000/-
4. Vunghaulian, L. Gangpimual	Rs.	200/-
5. Chingneikim, Central Church	Rs.	1,000/-
6. Donneiching, Central Church	Rs.	500/-
7. Nousuanching, Central Church	Rs.	500/-
8. Lydia Manneihat, Central Church	Rs.	5,000/-
10. Julie Lamneu, Awnchinkap Khuo	Rs.	2,000/-
11. Thangtungding & Family, Lailam Veng	Rs.	5,000/-
12. Upa Gouzamang, Central Church	Rs.	2,000/-
13. PWF Tonjang, Anntang tang	Rs.	1,000/-
14. Flora Hatnu, United Kingdom	Rs.	50,000/-
15. PWF, S. Muvanlai Anntang tang	Rs.	2,000/-
16. PWF Thingkangphai Anntang kg. 50		
17. PWF Tuibuang Anntang kg. 139		
18. PWF New Zoveng, Anntang kg.116		
20. V. Bethel, Tangmai Bag1 leh Meh tuomtuom bag 1		
21. Min gel utlou (Mikiphal) Anntang Dharam phou bag 1 leh Mimi box 1		
22. Manglal, Ngulzen Veng, Hai(Mango) Bag 1		

Petu zousie Mangpa'n hing gualzawl ta hen.

Note : Adih lou khate Office a suh dih thei zing ahi.



PATRON MEMBER-TE

- | | | | |
|---------------------------|------------------------------|----------------------------|--------------------------------|
| 1. Upa Gouzamang | 2. Pu Hav. Khamchinkhup | 3. Pu Khamzalam | 4. Pu Chinzasuan |
| 5. (L) Upa Liansuanpau | 6. Pu Khamchinthang | 7. Pu S.Dalthang | 8. Upa Kapkhanthang |
| 9. Upa Langginmang | 10. Upa S. Nangkhanlal | 11. Pu S. Lamkthothang | 12. Upa Dr. M. Lachinkhai |
| 13. Upa Khamchinjam | 14. (L) Upa D.K.Manlun | 15. Upa Suankhanmang | 16. (L) Upa Khupgou |
| 17. Upa Chinkham | 18. Upa Ngulchinkham | 19. (L) Rev. V. Vungzalian | 20. Rev. Retd. Kamkhosoi |
| 21. Rev. Retd. Tualzachin | 22. Rev. (Rtd.) H. Nengzaton | 23. Rev. Awnkhanhup | 24. Rev. Dr. Hangpi Manlun Zou |
| 25. (L) Pu Tuanzapau | 26. (L) Rev. Ginchinjam | 27. (L) Rev. Khamzasuan | 28. Upa T. Lamkthohawng |
| 29. Upa Khaichinmang | 30. Rev. Stephen Chinzathang | 31. Pu Khupkhanmang | 32. Pu Khaidohlian |
| 33. (L) Hav. Khamzahang | 34. Pi Vungzanuam | 35. Pu T. Gouzadou | 36. Upa Liensuonkap |
| 37. Pi Zelkhochiin | 38. Pi Hatkhanvung | 39. (L) Pi Ngaihoiching | 40. Pi Mankhannieng |
| 41. Pu Goukhanmang | 42. Pi Chingzalam | 43. Pu S. Thianzakhai | 44. Pi Kamkhanching |
| 45. Pu Haukhanpau | 46. Pu Tuallianmang | 47. (L) Pu Dongkap | 48. (L) Pi Chingkhanmang |
| 49. Pi Donkhonian | 50. Upa Henzakhup | 51. (L) Pu Saichinpau | 52. Pu Goumang |
| 53. (L) Upa Khamkhanhang | 54. Shie Laangkhanlal | 55. Pu Khamkhanlun | 56. Upa L. Tualkhanpau |
| 57. Upa Jamsianmung | 58. Upa Ginzadong | 59. Pu Kaizathang | 60. Pi Goizanuom |
| 61. Pi Thangneivah | 62. Pu Khamzathang | 63. Pi Donchin | 64. Upa Liankhanmang |
| 65. Pu Hauchinlun | 66. Pu T. S. Lal | 67. Pi Goichiin | 68. Pu T. Khupchinthang |
| 69. Upa T. Kaizalam | 70. Pu Paul Henkholal | 71. (L) Pu Soikham | 72. Rev. P.C. Manga |
| 73. Rev. Khamchinkhai | 74. Rev. Zamlianpau | 75. Rev. Chinzapau | 76. Rev. Retd. Kamkhozam |
| 77. Upa (L) Chinpu | 78. Pu Zamkhanthang | 79. Pu Chinglen | 80. Miss Chinhaunieng |
| 81. Upa P. K. Soia | 82. Pu Goukhai | 83. Pi Niangkhanmang | 84. Evan. Retd. G.L. Joshya |
| 85. Pi S. Chingkhanmang | 86. (L) Pu Vumchinkhup | 87. Upa Khaihenthang | 88. Upa T. C. Pau |
| 89. Upa Nengchinkap | 90. (L) Upa Jamkhongam | 91. Upa HT Manga | 92. Mrs. Vahkholhing |
| 93. Pu Hauliankap | 94. Pi Chinnu | 95. (L) Upa Ngulzakhai | 96. (L) Upa T. Gougin |
| 97. Pu Ginsuanhau | 98. Upa (L) Langminthang | 99. (L) Rev. David K.Samte | 100. Upa T.S.K. Samte |
| 101. Upa S.K. Khama | 102. Pu Kamkhopao | 103. Pu Thathang Taithul | 104. Pu Kamkhankap |
| 105. Bhim Prasad Ghatani | 106. Rev. M. Kapsuanthang | 107. Nu Chingneikim | 108. Rev. Khupkhanluan |
| 109. Pi Mannuamching | 110. Rev. Kaimuanlal | 111. Upa Nengkhanlian | 112. Nh. Deborah Zou |
| 113. Pu T. Kuppa | 114. Rev. (L) Mangsuanthang | 115. (L) Pu Lamchinhou | 116. Upa Pauchinlel |
| 117. Nu Kimneihoi | 118. Upa Kamgenpau | 119. Nh. Niangsuannuam | 120. Nu Ngaikhanvung |
| 121. Pu P. Sanjiv Zou | 122. Upa M. Kaichinkham | 123. Upa T. Sianchinpau | 124. Upa Sianzahau |
| 125. Pu L. Thenkhosoi | 126. Pu Kamsuanhang | 127. Upa Th. Kaikholam | 128. Upa Lunchinthang |
| 129. Pu P. Tongthang Zou | 130. H. Nehzamang | 131. Pu Thangsuankhup | 132. Upa M. Kamzadou |
| 133. Pu Jamkholian Munlao | 134. Pu Sianzakhai | 135. Upa Thangginsuan | 136. Pu Kapminlun |
| 137. Pi Tingzavah | 138. Dr. M. Limlunthang Zou | 139. Rev. Hauzalian Manlun | 140. P/P Suangliankap |
| 141. Rev. Ginlianmang | 142. Upa L. Mangminthang Zou | | |

LIFE MEMBER-TE

- | | | |
|----------------------------|--------------------------|-----------------------|
| 01. Upa (L) T. Khupkhenpau | 02. (L) Pu M. Ginzahau | 03. (L) Pu Selzapau |
| 04. Pu L.C. Pautungnung | 05. (L) Pi Khamkhannieng | 06. Pi Ngaiunuom |
| 07. Upa Chinsuanthang | 08. Upa Shanti Kumar | 09. Pu Kamkhohau |
| 10. (L) Pu Khamkhohau | 11. Upa Khamzathang | 12. Upa Chinkhanthang |
| 13. Pu (L) Tongzathang | 14. Pi Chiinneilam | 15. Upa Kulthang |
| 16. H/Sm. Upa Kaichinpau | 17. Pi Niangzalam | 18. Upa P. Doukholun |
| 19. Pu Kapminlian | | |

Undelivered

Please return to:

The Editor

KHRISTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a.
